

光緒重修天津府志

重修天津府志卷三

（紀三）

皇言三

詔諭

同治元年三月

諭戶部奏奉天運米船隻請仍由直隸僱備等語京倉
需米孔殷著盛京將軍玉明於沿海各屬倉存粟米
籌撥二十萬石迅速解京務期一律乾潔不得稍有
攙雜所需船隻著直隸總督文煜仍照歷年成案於
接到部文之日起限二十日嚴飭天津甯河兩縣將
應備船隻趕緊催齊迅速派員押赴奉天裝運儻逾

限僱備不齊卽著該督將該員等嚴參撤任仍交部
嚴加議處如船隻到日遲延停米待船藉端需索抑
或奉省裝兌遲延致令停船待米並著盛京將軍奉
天府府尹直隸總督隨時查察分別嚴行參辦以除
積弊而重倉儲餘依議

五月

諭御史朱潮奏請開畿輔水利以裕民食一摺據稱直
隸各河及浦港之水皆可開溝蓄洩引以灌田兼可
鑿井仿照恆升車式運水以資挹注請由紳富捐資
並嚴定地方官墾田殷最等語因思國家建都燕京

歲漕東南糧米數百萬石勞費不貲允宜妥籌北省
水利以裕民食而省轉輸直隸通省地方西北倚山
東南濱海凡山泉匯注及海潮湧灌之區均可開河
築壩引水溉田俾成沃壤康熙年間天津鎮總兵藍
理曾於天津地方開渠築壩引溉稻田著有成效雍
正年間曾於直隸設立水利四局經怡賢親王及原
任大學士朱軾辦理歲收稻米二十餘萬石明效在
前彰彰可觀地方大吏果能如藍理等之留心經濟
力求足國裕民之謀卽南省漕運偶有梗阻亦何慮
倉儲之或形缺乏耶該御史所奏實係方今要務兼

可爲儲備京倉久遠之謀著直隸總督順天府府尹速將所轄境內山泉河渠淀湖共若干所並可開渠引水地方若干處切實查明繪圖貼說詳細具奏至辦理一切事宜及該御史所稱鑿井造車並以田地之墾治與否定府縣考績之殿最及勸紳富捐助經費給予獎勵之處並著文煜萬青藜石贊清一併妥議章程覆奏毋得以事涉難行稍形推諉

二年三月十五日

上諭給事中劉有銘奏請將直隸滄州殉難旗民官紳人等開單懇請旌卹一摺咸豐三年粵匪竄擾直隸

滄州各該駐防官兵軍民男婦或慷慨捐軀或從容
殉節均堪憫惻該給事中籍隸畿疆見聞較確所有
單開之城守尉德成等九千一百三十員名口著該
部查明除業經給予卹典外餘俱照例分別旌卹另
片奏滄州地方前被粵逆竄擾後士民捐修軍械經
前任城守尉奏準保獎日久未據覆奏等語著劉長
佑會同該州城守尉查明前次捐兵械出力各紳董
核實奏請獎勵毋許冒濫該部知道單片併發

四月

諭僧格林沁奏直隸開墾稻田已有成效請歸地方官

經理並前任鹽政捐貲倡辦請獎等語直隸自天津
巡東至新城一帶海河兩岸水田日久荒蕪經僧格
林沁等捐貲開墾見屆三年辦此項水田嗣後卽著
歸直隸總督派員經理自行報部以歸簡易而昭核
實其鹹水沽等地畝酌減租米新章是否允協及上
年所收米石是否變價應作何支放之處均著劉長
佑核明辦理前任長蘆鹽政寬惠捐資倡辦尙屬急
公應得獎敘著內務府核議具奏

十一日

上諭都察院奏直隸舉人唐寶鑑遺抱告以親鄰殉難

等詞赴該衙門呈訴據稱咸豐三年九月間粵逆竄至靜海縣屬之唐官屯監生古太平率團殺賊因眾寡不敵古太平與其弟古岫姪古欲正次子古欲齊同時被害生員孫懷少亦被刃傷殞命生員杜駟於靜海縣城失陷時罵賊被戕杜駟之子杜愛蓮子婦石氏孫杜柏年杜椿年杜金榜孫婦孫氏孫女舉姐立姐均投水殉節民人孟兆乾及妻丁氏子孟玉衡童生李贊廷及其母段氏生員邊允誠及其子邊鋒亦均同日被害是年十月間逆竄四鄉武生王崑山等率團迎剿身受槍傷多處遇害尤烈生員劉毓瑛

高曾庶武生侯毓振陳世昌童生蕭人徵並弟蕭博
徵其妻劉氏蕭十一女蕭氏弟妻高氏童生任玉崑
之妻任氏孫婦劉氏該舉人唐寶鑑之族姪唐永春
均先後遇賊殉難等語靜海縣監生古太平等或殺
賊捐軀或闔門殉難均屬忠節可嘉著劉長佑查明
奏請分別旌卹

四年十月

諭萬青藜卞寶第奏官荒地畝擬試墾水田請飭議籌
辦一摺據稱甯河縣與天津縣交界地方有荒地六
七十里曠無居民地方廢棄可惜查甯河縣所屬塌

河淀軍糧城等處濱臨海隅若引水灌溉可開稻田
一千餘頃歲可稅稻米十數萬石北地倉儲近畿民
食均有裨益請飭侍郎崇厚派員履勘會議章程請
旨辦理等語咸豐年間科爾沁親王僧格林沁在大
沽海口一帶興辦水田倡捐辦理開稻田四千二百
餘畝嗣經崇厚督員經理使斥鹵之區咸有沃壤民
利賴之今甯河天津交界地方查有荒地數十里經
卞寶第函致崇厚詢訪情形並據該侍郎覆稱軍糧
城一帶臨傍海河但須開河二道官爲籌款招佃墾
種可得田千餘頃該侍郎連年在鹽水沽一帶勸墾

水田收穫頗豐自必確有把握卽著崇厚派委委員
會同地方官前赴軍糧城一帶履勘情形酌議章程
會同順天府府尹直隸總督奏明請旨辦理以興地
利而裕民食

二十一日

上諭給事中張修育奏直隸各屬辦團出力及陣亡練
丁未蒙獎卹請旨飭查一摺直隸天津河間兩府從
前勸捐辦團防堵捻匪出力計期五月有餘該官紳
等不無微勞足錄天津調赴直隸威縣山東莘縣等
處練總王兆鳳暨練丁二十七名同時陣亡亦堪憫

側著劉長佑詳悉確查分別奏請獎卹

五年正月

諭前據萬青藜卞寶第奏官荒地畝擬試墾水田當經
諭令崇厚會同順天府直隸總督派員履勘茲據萬
青藜等勘明海河北岸自邢家沽起至卧河村止開
濬環渠中間洩水渠一道渠旁兩岸可開墾稻田五
百餘頃計須渠工約銀八千數百兩此項銀兩准由
崇厚借款興辦卽著督飭委員招戶認墾將酌定章
程及應行事宜認真經理一俟辦有成效仍當將附
近一帶荒地次第開墾以興地利而裕民生餘著照

重刊天潢月元 卷三 詔諭
所議辦理該部知道圖併發

七年四月

諭前因捻逆紛竄諭令左宗棠嚴防直晉交界李鴻章
嚴防直東交界以期分路迎剿乃該逆由豫竄東由
東竄直駛至天津附近地方迭諭李鴻章督率所部
前進並將前敵各軍悉歸調度以一事權見淮軍雖
先後到津而該大臣自三月三十日自開州發報後
迄今並無奏報未知行抵何處該大臣責任統帥進
剿機宜豈宜遲緩至此著卽統軍馳赴北路督率各
軍扼要駐劄廣籌方畧相機殄滅其已到之皖豫各

軍均著歸李鴻章調度以專責成左宗棠見由德州前進卽著扼劄運河以西分兵進剿丁寶楨亦已進駐交河並著該大臣等會商無分畛域互相策應該大臣督撫等均受朝廷重寄斷不可稍有推諉趨避儻能一鼓殄除自宜同膺上賞若再遲延貽誤亦必重治其罪懍之勉之

七月

諭本日據李鴻章英翰由六百里加緊馳奏官軍會剿捻逆全股蕩平大概情形各一摺覽奏甚爲欣慰前據李鴻章等迭次奏報追剿捻逆賊勢窮促諭令各

該大臣等迅速殄除茲據奏稱六月二十日提督劉松山督隊追至鹽山滄州等處截殺三四百名布政使潘鼎新提督郭松林張得勝侍衛陳國瑞會同追賊至德平等處斬其逆首羅六郭松林復會同都統善慶溫德勒克西追至商河該逆涉水向西南逃逸潘鼎新等仍復冒雨力追近至高唐該逆圖撲運河經提督劉銘傳郭松林候補京堂袁保恆等聯絡豫皖各軍分段扼守二十八日賊由西向東回竄劉銘傳調軍追殺適郭松林追賊東來攔截竄路縱橫合擊大股賊匪全數擒斬並擒獲張總愚之子葵兒正

法並生擒賊目多名共計生擒老賊三四千人餘逆
悉數殄除全股蕩平從此直隸河南山東各地方生
民得以安業慶幸良深惟據稱張總愚投水淹斃逆
尸尙未尋獲著李鴻章等查明張總愚實在下落無
論生死務須得有確據並著督飭各軍搜捕餘逆總
期淨絕根株以免後患李鴻章前因督軍赴援遲延
並不能剋期滅賊曾迭予懲處該大臣深知敬畏奮
勉督勦冒暑遄征克奏膚功自應先行開復以彰勞
勩李鴻章著先行賞還花翎黃馬褂騎都尉世職其
迭次因勦賊不力降革各處分並著查明開復左宗

崇縱賊出陝追勦尙屬迅速抵直後督軍截擊扼守
運防亦頗嚴密著將該大臣迭次降革各處分一併
先行開復河南巡撫李鶴年前以防勦貽誤量予懲
處惟該撫所派張曜宋慶兩軍勦賊甚爲出力並該
撫督隊出境防堵亦能顧全大局李鶴年著先行開
復革留處分並賞還頭品頂戴李鴻章暨英翰丁寶
楨均係一律具報肅清聽候恩旨所有迭次勦賊最
爲出力之劉松山郭寶昌郭運昌宋慶張曜善慶溫
德勒克西陳國瑞郭松林潘鼎新跟踪追躡歷時最
久不辭勞瘁甚可嘉尙劉銘傳甫經抵營雖於勦辦

此股捻逆戰績無多惟該提督前勦任賴各逆勤勞卓著此次會勦蕩平醜類亦屬一體有功該都統提督等及所部馬步各隊出力人員著各該大臣督撫等迅速查明核實請獎以昭懋賞其餘出力員弁亦著一併請獎毋許冒濫

八月二十四日

上諭通政司副使劉有銘奏訪聞南皮等州縣殉難紳民婦女等請分別旌卹一摺本年春間捻逆竄擾直隸南皮等州縣該處紳民等或禦賊捐軀或罵賊被害均屬深明大義殊堪憫惻該京卿籍隸直隸見聞

軍機處月摺
較確所有殉難之童生劉書毅等二十三名口均著
交部查明分別照例旌卹並準其捐貲建祠以彰忠
節

九年十月

上諭軍機大臣等崇厚等奏天津機器局告成動用經費各款開單奏報一摺天津設立機器局經崇厚督飭在事人員度地庀材隨時監視密妥士等認真經理見已一律告成所用款項既據崇厚等聲稱事由創舉難以例價相繩所有單開用過銀數卽著准其開銷至密妥士所稱再添研藥機器三分每年所出

火藥可增三倍而人工所加有限較之採買即可節省尙屬久遠之計崇厚見在出差應如何斟酌添製開拓之處著交李鴻章妥爲籌畫奏明辦理該督於此事講求有素務當督飭津局委員事事悉心研究務將此中機巧竟委窮源庶可有裨實用不致徒託空言

二十八日

上諭前據總理各國事務衙門奏遵議毛昶熙請撤三口通商大臣條陳當諭令李鴻章妥籌應辦各事宜茲據該督酌議章程具奏天津地方緊要自宜因時

變通三口通商大臣一缺著卽行裁撤所有應辦各事宜均著歸直隸總督督飭該管道員經理卽由禮部頒給欽差大臣關防用昭信守並著該督於每年海口春融開凍後移紮天津冬令封河再回省城儻遇有緊要事件必須回省料理亦准其酌度情形暫行回省事竣仍赴津郡以資兼顧其山東登萊青道所管東海關奉天奉錦道所管牛莊關均歸該督統轄惟中外交涉事件較繁自應添設道員管理著照所請准其月設津海關道一缺專管中外交涉各事件及新鈔兩關稅務並責成該道督飭府縣悉心妥

辦仍隨時稟請該督酌核辦理嗣後津海關道缺出
著由直隸總督揀員請補其餘未盡事宜著李鴻章
迅速妥議具奏

十二月

諭前因戶部奏變通驗收海運漕糧及海運做照河運
章程辦理當經諭令李鴻章等分別會議具奏茲據
李鴻章會同倉場侍郎酌議具奏據稱直隸總督每
年於春融後移制天津所有天津驗米自應遵照部
議就近經理無庸月請派員驗收近年來海運米石
較多總督事務繁重未能專顧一端請仍照向章酌

派倉場侍郎一員赴津會同查驗其通州收海運事宜由留通倉場侍郎經理毋庸另請派員等語明春江浙海運漕船抵津著戶部先期奏派倉場侍郎一員赴津會同直隸總督妥籌辦理其通州驗收轉運事宜卽由留通倉場侍郎一手經理毋庸另請派員以專責成餘著照所議辦理

十年四月

上諭軍機大臣等李鴻章奏查閱海口礮臺見籌布置情形等語大沽海口南北兩岸礮臺日就傾壞李鴻章見令副將羅榮光督率兵夫擇要興築先將營壘

加挑堅厚添築夾牆並擬於礮臺前加築護臺復於
牆外添築攔潮土壩一道以免潮汐侵刷又將蘇局
舊存炸礮及江甯礮局製成洋礮陸續運津並委員
添購西洋新式巨礮數尊以備更換操習所籌均係
未雨綢繆至計卽著該督妥爲經理行之以漸持之
以恆務令海疆要地屹若長城方爲不負委任至北
塘與大沽犄角關繫緊要李鴻章已調周得勝帶道
化練軍一千名移紮北塘卽著飭令該總兵實力操
防將應設礮臺次第修整俾壯聲威其各該處應需
經費並著該督悉心籌畫期收得寸得尺之效不可

重刊元澤月元二
三
詔諭
三
畏難中輟致廢遠謀

七月

諭給事中夏獻馨奏敬陳辦賑事宜一摺本年直隸天津等處被水業經降旨准將江浙等省米石截留賑濟該給事中所擬清查戶口防察奸宄多分賑廠選擇紳耆剔除弊端籌給醫藥各條不爲無見著李鴻章按照所陳各節飭令辦賑各州縣體察情形實心經理務期實惠均霑不得有名無實

八月

諭夏同善奏久雨爲災請虔誠祈晴並敦節儉廣賑濟

開言路清庶獄一摺本年入秋以來雨澤過多恐成
災歉業經降旨於本月初六日拈香祈禱以迓晴暘
因思順天保定天津河間等屬地勢低窪其被災處
所業准李鴻章所請截留漕米妥辦賑濟此外如續
有被災之處並著直隸總督順天府府尹查勘情形
量加撫恤毋令一夫失所陰陽沴戾災祲薦臻朕宵
旰廑思倍滋悚惕惟當躬行節儉以裕物力而恤民
艱刑罰失當不足感召祥和中外問刑各衙門尤當
恤刑慎獄清理積案不准拖累不辜以消災沴著在
廷臣工於民生疾苦政事闕失直陳無隱以副朕遇

災修省至意

十六日

上諭御史文明奏被水災民四出求食請豫籌賑濟一摺本年直隸天津等處被水曾准李鴻章奏請截留江浙等省漕米以資賑濟並諭該督飭各屬妥爲撫恤李鴻章務當恪遵前旨督飭地方官將賑務認真經理設法安撫居民毋任四出覓食轉致流離失所京師例設各廠該御史請酌給米石先期開放之處著順天府五城御史屆時酌核辦理

同日

諭李鴻章奏直隸見辦災賑招商購米請飭蠲免釐稅
嚴禁遏糴一摺本年直隸天津等府屬被水成災居
民困苦前經截留漕糧採辦賑米以資撫恤茲據李
鴻章奏稱災區甚廣待哺日長全賴商賈輻輳源源
接濟見飭委員分赴各處購辦備放並招勸紳商購
米運赴被災處所售賣惟商米經過局卡應完釐捐
而鄰省州縣又往往任意閉糴深恐糧價日昂民生
日困等語近畿災黎待拯應設法變通著奉天江南
山東河南各將軍督撫府尹等將商人應完米糧釐
捐暫予停免其由李鴻章派員招商採運米石著飭

重刊三才圖會卷之三 詔諭
各關卡驗明護照免稅放行俟來年麥收成熟再行
照章抽收並著出示嚴飭地方官紳國戶毋得遏糴
居奇俾商賈流通糧價平減庶飢民得霑實惠該部
知道

十二年九月

諭李鴻章延煦畢道遠奏江浙漕糧海運抵通擬請改
令糧道自行運通一摺向來江浙漕糧海運到津用
官剝船到通交納乃行之既久滋生弊端本年海運
白糧及輪船所載漕糧改由糧道自僱民船運通較
用官剝船運送米色尙爲乾潔李鴻章等請將嗣後

南糧變通辦理係爲剔除弊端起見著照所議所有
來歲江浙漕糧卽著改由糧道運通交納毋庸在津
運收著戶部兩江總督江蘇浙江各巡撫一體遵照
辦理其應行變通章程著李鴻章延煦畢道遠悉心
妥議具奏

光緒四年二月

諭詹事府左庶子黃體芳奏災區太廣宜籌拯救之方
請招徠商販凡遇貨赴晉豫者若帶糧百石除免米
糧釐稅外並免他貨稅銀數十兩千石者免稅百兩
以期踴躍運赴等語前據司業寶廷奏官運不如商

運業令各該省酌辦茲該庶子所請各節是否可行
著該撫等酌度情形妥籌辦理又稱上年天津粥廠
失火燒斃二千餘人委員平日不知防火火發後不
知去向以致門者禁不許出同歸於燼僅予疏職不
足蔽辜天津粥廠失火一案茲據李鴻章奏傷斃多
命並不確計人數著再詳細察查如所參屬實卽將
該委員等嚴參治罪以爲貽害民生者戒又稱倉儲
積弊已深近年海運抵通聞有帶銀回漕之事雖無
實據要之盜賣蠹蝕路人所知等語著倉場侍郎認
眞整頓有犯必懲毋得顚頊了事又稱天津保定粥

廠裁撤以致京城流民日多請於近京分設粥廠一節所見甚是見在京師七門外已添設粥廠五處贍濟外來窮民卽著李鴻章仍於天津保定等處酌設粥廠以拯災黎其應如何擇地分設之處並著查看地方情形妥籌興辦又稱直隸旱災甚重大荒者約有十州縣不止河間一府眉睫之患宜爲預防著李鴻章速籌巨款遴派賢員分投賑撫地方官有玩視民瘼者卽予撤參毋稍姑容

重修天津府志卷四

紀四

皇言四

聖製

聖祖仁皇帝御製文

幾暇格物篇

九河故道漢唐宋諸家之說不一或謂在濟南境內或謂遠界永平而酈道元謂九河苞淪於海以朕揆之其九河入海之處在今天津之直沽而九河故道不出滄景二三百里間也蓋水性就下今南北之水以天津爲尾間地最窪下雖數千百年中或陵谷變遷而其高卑

大勢南北定位必有不可易者卽以禹貢之文考之可以斷矣禹貢曰至於大伾北過泇水至於大陸又北播爲九河疏云大伾屬魏郡黎陽泇水在信都大陸澤名夫黎陽今之濬縣信都今之濠州大陸澤在今之東鹿界而河間在濬縣深州東鹿之北故曰又北也又九河旣道疏云平原以北平原今德州境言德州以上也漢書溝洫志許商云九河之名有徒駭胡蘇鬲津在成平東光鬲界中此三地今皆屬河間杜氏通典云鉤盤在景馬頰覆釜在趙郡景卽景州趙郡今涿易南古所謂燕南趙北也輿地記云簡河在臨津金史地理志云

南皮縣有潔河太史河傳志所載九河故道之在河間境也又豈不彰明備著乎則天津爲同爲逆河入海之道無疑矣河自周定王時已南徙九河故跡亦漸湮廢後人不能深究地勢多穿鑿傳會其指在濟南者旣失之過南其指在永平者又失之過北而鄭康成據緯書謂齊桓公填塞八河以拓疆界其說益滋譌謬耳凡人讀書能正據經文考以古今形勢則諸家之說自有折衷夫河間古郡稱名已久其所以謂之河間者以其在九河之間也顧名思義又可知矣

前志謹按禹貢九河第言其數而未詳其名爾雅釋地篇詳其名矣而未誌其處西漢去古未遠已

不知九河所在迄今又數千年欲執卷辨方實指其所謂徒駭覆禡示千古以可信宜眾說斷斷而莫能決耳然徒駭之爲滹沱滹沱之由平舒入海漢書確有明文又大陸古澤實爲禹迹之舊漢書河水至章武入海水經注清河自東光以下會大河故瀆則今直沽之爲禹河入海故道無疑人第惑於河水由章武爲漢河之論不知周時河已南徙後世漸徙漸南地勢北高南下斷無周時已南而漢復北之理

聖祖仁

皇帝考古證今合百家之說而折衷之確然指天

津爲禹貢逆河入海之道使知濟南永平之說之非而萬世治水之績乃得把握之方要由南北水利時塵

宸衷禹功所及有默會於

宵衣旰食閒者迄今川瀆平成永賴

帝澤蓋是篇實示其端焉

大沽口海神廟碑

朕昔巡歷天津詢知直沽海口去盛京數百里舟航泛

涉實利轉輸迺者奉錦兩郡歲穀不登兵民乏食探廩
朕懷而陸運之程踰山越谷曠日爲勞厥惟創興海運
始足拯濟羣生爰命學士陶岱往蒞其事酌撥倉粟運
以巨艘出直沽之口東指遼海篙師權卒并力一心波
濤不興天日清皎祥風遙送帆槳如馳甫三日卽達盛
京賑給所暨周徧窮簷俾此京輔之邦咸與遂生樂業
則惟爾海神有靈克相朕以寧茲兆庶也朕惟望秩之
典國有常祀而濟運之功尤宜報享天津東舊有海神
廟今特命工庀材重加營建朱甍碧瓦規制崇宏庶幾
鑒茲惻怛益加祐助豈惟予一人惠鮮之意藉以有成

將盛京世世軍民皆得邀神貺於勿替也是用揭諸穹
碑表神之功德以垂永久焉康熙三十六年七月

詩

天津

轉粟排千艦分流納九河潮聲連海壯樹色入京多鼓
楫魚龍伏停帆鸛鶴過津門秋望遠明月湧金波

水淀雜詩四首

輕舟十里五里垂柳千絲萬絲忽聽農歌起處滿村紅
杏開時

春水船行天上冷風雨過田家深樹幾聲布穀晚晴千

縷明霞

銜泥雙燕沙際喚雨單鳩樹頭昨夜桃花新雨鯉魚躍
入蘭舟

爲愛沙明水遠更看柳顰花新草木禽魚咸若河山民
物同春

天津

河柳絲絲變嫩黃海門遙望色微茫賈航商舶連檣至
賈費時看集萬方

前過浙江桃花已放今同鑾至津門復見桃花盛開調
寄點絳脣

再見桃花津門紅映依然好回纔纔到疑似兩春報
錦纜仙舟星夜昞辰曉情飄渺豔陽時嬌不是垂楊老

世宗憲皇帝御製文

大沽口海神廟碑

天津直沽口海神夙著靈應

皇考時以盛京歲偶不登命泛舟輸粟出直沽口浮於遠
海達於奉天惟神効祥三日而至

皇考嘉悅爲神立祠製文勒石昭美報也朕嗣膺大統輯
寧兆庶凡天神地祇能爲我民禦災捍患者咸稽舊典
加封秩祀況海爲百谷王沐日浴月出雲興雨品物遂

生其利益於民甚溥而神之降福茲土昭明顯融歷有
年所又朕心所敬禮者也既崇封號以答神庥爰敕有
司載新祠廟更立豐碑垂示久遠神其益降嘉祥舟航
以通風雨時若永惠我民則朕有厚望焉雍正四年六
月

長蘆鹽法志序

洪範之敘五行始於水而終於土水以潤下作鹹土以
稼穡作甘五味之物唯鹽不可一日闕其用殆與粒食
均周禮鹽人掌鹽之政令以共百事之鹽蓋古先哲王
知鹽之爲用切於民生故設官以掌之使其足於國周

於民平其法而息其爭用意至深遠也自漢以來代修鹽政或失之疎或失之密皆不便於民惟唐之劉晏職掌度支權五方之鹽以寬萬姓之賦得重民抑末之意內外便之我國家撫御寰區修和府事淮浙滇黔秦晉產鹽之所皆設官以領之長蘆鹽政則自析津而東暨於青齊乃禹貢所書厥貢鹽絺之地密邇京畿爲職綦重朕念切民生勤勞庶政欲四海之民以生以食無一物不得其所況輦轂之近日用之需尤宜著爲令典以備稽參者哉侍郎莽鵠立視鹺三載修長蘆山東鹽法志共三十卷書成來獻朕覽其大凡載詔敕以奉公考

沿革以法古職官定而法制禁令行焉疆域分而寃籍
商政著焉法必待人而行故稱述宦蹟尤有關於鹽政
苟居是官者能深思設官分職之指專心一力克盡其
職使國家無關於歲需而閭里常充於日用則不惟職
舉事修而於古先哲王崇本抑末之深心我國家惠養
元元之至意交有裨益是則朕之所厚望也夫雍正四
年七月十三日

高宗純皇帝御製文

重修大沽口海神廟碑

渤海介析木之津襟帶畿輔捷雄閭而鞏之實惟神京

重修天津府志卷四 聖訓
左絡翕受靈長厥利斯溥

神故不列海濱秩次康熙間盛京有汎舟之役祗波颺
颿厥事迅蕝我

皇祖嘉

神之功飭廟薦馨祀在彝典我

皇考詔卽舊規重事葺治

豐碑並峙昭鑠瀛際崇示禮秩莫不備舉越歲旣久風
雨剝侈無以揭虔妥靈迺發水衡鼎厥工楹輝騰新式
奐式壯朕今春率

皇祖舊章巡幸天津莅而謁禮爲詩以落之蓋自淀池循

子牙涉海河旣得悉其歸墟原委至則登觀海之臺澄
波澶潞引控瀛棣東眺扶桑煥絕蔥鬱光延我陪都而
旅順登萊廟島環拱羅布胥靖以安其旁穿壕塹場曝
鹵出素邱如皜如牢盆之獲什倍而斥壤沮洳瘠不宜
植於是蠲澤民之逋爰復愷然曰渤海之繫誠大矣凡
海職納而茲所職乎納者尤要夫東南之海吸吞江河
風濤是防治在塘堰若西北諸水滹沱漳易衛白或奔
瀉千百里而永定最橫且駛潞以七十二淀淪以三沽
醴澹委輸厯直沽以入禹貢所謂同爲逆河入海者此
居其大半而崇沙外互如戶斯闢無拒而壅流乃軌注

曩者京南州邑苦集潦載洩載導田廬用寧邇復相示
吝度渠之墊者濬之隄之缺者續之施人力靡弗至洎
覽五牘春灌夏禁啟塞以時匪潮弗盈匪寒弗縮噓喻
迴幹通乎自然固非人事補苴之可作而致而朕飢溺
爲念時罔不在民則因

天之功其又敢不事事且海之爲物旣鉅受川迤波有宿
有統與夫所以若雨暘迪節宣康乂我民人而惠阜我
田疇者咸依神庥洪惟我

祖

宗懷柔報祀胙饗昭融厯有年所朕勤思下氓計安恬者

甚摯亦惟

神是憑蘄自今祇循儀軌宣道和令於以疏濶輯瀾俾
暑無盛漲秋無霖霖用貽我甸人無疆之樂利嗣是百
執事歲有事於廟下醴芬醑膺無不恪共而

神之彰靈効順以宏佑我邦家者亦永永弗替爰系其
事於碑以示來許乾隆三十二年

詩

上巳後一日至天津策馬由府城觀民閱河遂駐行館
作

省方茲日莅天津策馬沿隄入綺園三十二年念常注

京垓兆庶意俱親地當南北舟車要水會東西河海循
何必管絃續民樂伊余所喜在還醇

海神廟瞻禮述事

崇構海河濱初來拜謁伸配

天常互地濟物卽爲

神紫澥安瀾慶青蓮示法眞

兩朝碑仰讀

意總爲斯民

海光寺作

像設花宮坐大慈普陀彼此孰然疑可知海印發光處

正是如來按指時

望海寺二首

南運河邊望海寺海其遙矣海河然觀音是佛觀察智
普遍三千與大千

李賀詩人具卓見杯中海水瀉猶然堂中大士如如望
道理那更計百千

觀海臺

蕩蕩津門瀉大沽滄溟東望尙遙紆清流渾派歸淵極
坤括乾苞充德符豈似餘杭沙漲藉况經自古海氛無
留都來往糧艘運總濟吾民關坦途

瀛裔一首

在豐財場

巡方到處塵黎黔
瀛裔民風策馬覘
力穡仍艱登稷黍
資生惟是藉魚鹽
廬田概與均蠲負
沙戶因之期引恬
斥鹵安能變膏壤
漢時早說海波漸

免天津府屬積欠銀穀並及直隸通省詩以誌事

天津瀕海濱沮洳實澤國
以此多積欠可任催科力
遊豫貴休助追逋資職殖
絜矩念通省那無向隅泣
一律命免之俾民足衣食
民足孰與不司農莫恡惜

閱武作

重鎮海疆守今來况始過
因之觀素習可說不揚波
結

隊明組練伸行列鶴鵝巡方應詰武行賞意猶多

津水早春詞用錢陳羣韻並寄命和之

香樹齋集偶披翻清虛婉約真除煩早春津水詞更美
正值三月停巡軒近海民計夙所廛幸看氣象猶飽溫
摩肩接踵日輻輳迎鑾出欲空巷村江南輿情一例篤
爲憶詩客安詩魂當年慵書此閱歲每有佳句無斧痕
自從歸來樂桑苎直沽塌淀空潺湲詩筒遐寄俾賡韻
畢然南望紛川原

庚寅暮春乘馬由天津府城至行宮一律

維舟策馬歷城闔馬足羣黎任覲親遊必以休休利溥

樂原與眾眾情申古來稀慶今誠慶

聖母八旬予六旬五福箕疇壽居首斂時

天錫錫臣民

柳墅行宮作

舊識行齋路海河河岸東昔巡纘

聖蹟今喜奉

慈宮陌柳陰垂綠階花暖放紅物胥含樂意我願與民同

庚寅季春中澣題

祝

齡從眾請復此至天津乘令當三月施恩逮萬民耕桑所

勤問歌舞亦紛陳返已惟生惡難言斯播醇

海光寺作

大士坐堂堂蓮宮向海光可知効清晏總爲利耕桑
意禮相好

洪禧祝

壽康前年與今歲一瞬祇如常

望海寺作

波羅梵宇碧溪潄恍是普陀紫竹林卽色不殊卽空體
海河常送海潮音到來門徑宛相識悟去慈悲沒處尋
未得無心心合眾延

禧祝嘏一真心

免天津府屬及直隸通省積欠詩以誌事

蠲賦王畿首被澤析津無更可加恩前巡因憶積斯道
近歲應餘欠者存概與除徵曰銀穀並教通省逮黎元
村村春種期秋熟催呼何愁吏叩門

再疊錢陳羣津水早春詞韻一首

大沽赴海清波翻海口昔閱茲不煩茲來實以俞眾願
祝

釐攬勝奉

翟軒似繪花柳秀而野漸長風日和且溫吳山廣陵有同

約來賀詎止津瀛村香樹齋翁命且俟更憐歸愚地下
魂二老外與言詩少片雲空宇盍留痕津水早春詞重
和還鄉直達波潺湲東坡先生例具在不妨險韻數疊
原

天津迴鑾之作

虔奉

慈徽諸禮成曉乘安福返都京

康疆逢吉真愜意男婦駢隨有戀情夜雨雖微塵已淨朝
煙欲泮冷猶輕究當優霈方紓念節過清明迫待耕

辛卯望海寺作

寺建海河濱初來自丁亥去歲再臨茲轉眼復一載海
去此尙遙溯河得望海大士泯分別如是觀自在斯行
爲巡齊匪爲津風採便道成小憩遂命維舟解柳墅若
有俟分付迴鑾待

免天津府及順天府所屬積欠詩以紀事

休助古所云懷保今所勉昨歲此地災賑賑期均徧巡
方茲目覩幸道溝壑轉然未經見多加惠詎宜緩兩府
界壤連受沴苦弗淺三州及八縣舊欠概與免武清獨
無欠豈不向隅歎獨供十之五用以旌良善麥收備得
豐庶少濟屯蹇是惟賴

天恩非吾力能辦

癸巳暮春月至天津府卽事一律

行時隔歲至津關依舊觀風侍

懿顏

御航賞春

歡益暢乘驄問俗力猶閑最憐幼挈老扶夥一任鞭塵馬
足閒雖是眼前都踴躍向隅隱詎少民艱

望海寺瞻禮成什

望海祇園臨海河隔年此復一相過雖然縟節繁文禁
仍有衢歌巷舞羅祇以祝

釐合眾志遂因同悃禮三摩普門無量慈悲願願作籌添
曼壽多

免天津府屬積欠及直隸前歲被災別州縣積欠詩以
誌事

每來免積欠隔歲復茲有所以切祈年綏豐屢難偶見
者恩固加未見惠應受顧此而遺他寧稱絜矩道次第
與豁蠲催科俾道負調變無良方用是增忸怩

暮春三疊錢陳羣津水早春詞仍寄去命和

光陰真似逝水翻萬幾那敢謝勞煩搜題摘句乃餘事
時亦引興因遊軒而惟觀民體休助衣食計欲飽與溫

斯來本爲閱河務因緣復至章武村行館憩息春之暮
蝶夢不離花閒魂屏額勒昔和錢句彼無斧鑿我有痕
一篇寄付北風去望予渺渺波潏潏卽今可與言者孰
莫辭更疊險韻原

天津迴鑾之作

停鑾三日此揚舫行館迴看柳墅青閱武掄文舉次第
直沽塌淀悉情形獨憐民戀就瞻切常奉

慈歡億萬齡兩岸麥苗方勃長爲因望雨意無靈

丙申清和月至柳墅行宮作

遙看籠墅青近識逕和庭又以三年別居然此日停帷

期供憩息何必綴臺亭細雨午時歇中心益不寧
策馬由府城至海神廟拈香用近作過天津府城詩韻
前度鳴鞭過綺闌由城經此覲從民長街小雨惜乎弱
靈廟甘膏籲以親入夏恆風渴已亟代

天敷澤望猶諄密雲願卽霈嘉霽虔叩惟抒一念真

崇禧觀香林院瞻禮作

清河入海河泊岸俯洪波琳宇開香院蕭臺臺鬱羅都
緣籲安晏豈是豫卷阿路便申瞻禮祈民福佑多

望海寺作

臨河側岸建蘭若望海因之遂得名大士如如不動念

眾生箇箇仰慈情聊緣路便駐舟愁更趨途長解纜行
柳墅去茲十餘里置之停蹕待迴程

天津起程迴鑾之作

安福御艦溯海河夾隄十里備笙歌迫因希澤方愁已
一任排當嬾聽他昨日微零仍卽止今晨略蔚又旋過
農民祇盼銀牌喜未識其心苦若何

戊申仲春至柳墅行宮作

一紀重來觀赤子五齡新喜抱元孫依然策馬過城市
不許前驅禁笑喧近海古來無海患津天宿應沐

天恩肆鄙富庶笙歌盛返樸因之意默存

崇禛觀瞻禮成什

崇禛古觀枕津河一紀春秋此重去聲過愜意蒙

麻錫海宴

月初據福康安奏已將逆首林爽文生擒檻繫來京固已仰荷天庥尙冀南路並將莊

大田亦卽拏獲以靖肅躬瞻禮額時和藹予深感

恩駢疊

上帝高居示鬱羅萬物有心

天普鑒

天在人人心中隨方示象因難議祠宇之各處多有也難拘禮議時祠多

望海寺瞻禮成什

十載重言至心空禮法王光陰誠速速相好自堂堂清

晏南和北紛趨民與商迴思祝

釐況望海祇茫茫

海光寺作

清蹕禮蓮宮東瀛吐旭紅萬民忭瞻仰一意祝和豐我
自勤宵旰那能悟色空如來暗指處歷劫海光同

閱武作

巡方之所重詰武及修文昨已試諸士今應閱眾軍熊
羆分列隊鵝雁聚成羣原可百年偃休疎一日勤酬勞
略行賞合度亦堪欣敢曰瀛氛靖戒安意正殷

免天津民欠銀穀詩以誌事

巡鑾依例有恩施所過十分三免之茲覽民風益親切

重刊天津府志 卷四 聖製
應寬歲久莫呼追數雖弗夥究霑惠獨則無徵俾普熙
共戴

天庥昨秋稔前旬雨又麥田滋

崇禧觀書室作

清河順水東溯游南而西轉閭閻稠郡城已近見碑堧
例於北岸泊行舟行舟旣泊遂登岸岸頭老幼迎鑾見
尊親意比更前篤咫尺崇禧謁古觀古觀之旁書室存
熟路原識徑與門歲歷一紀斯再至却如瞬息過高奔
高奔過隙迅如此樓臺點綴增多矣商力豈非民力哉
因之不憚弗因喜弗喜觀聽紛笙歌熱鬧可厭填津河

觀民本義詎在此按轡自問斯爲何

清明日賜扈駕眾官食卽席得句

津門冷節值清明昨恰捷音到御營賜以饌應同眾豫
默無賞覺矯其情花雖含蕾曦烘暖柳已舒條風拂輕
樽俎內臣佈遲慢笑他寒食太循名

庚戌清和月至柳墅行宮卽事一律

浮橋策馬過河濱河上行宮綠柳循臺館嫌看重修葺
商民豫祝夥排陳旣成不說愧一已適可修儀示遠人
題壁舊辭何太似望霖如例縞眉頻

中澣策馬由天津府城至海神廟拈香疊丙申詩韻

八旬策馬過城闌露冕因教悅萬民幼挈老扶依舊眾
叩瞻躍喜較先親所慚仍是昔年况致請殷希

神佑諄虔謁自慚誠不至腆稱曷

惠鑒誠真

崇禱觀展謁作

旋蹕至天津

崇禱展謁申東巡蒙

昊貺時雨望心寅無德慚調燮有愁廬隔昀弗聽寬解語

祇覺忸怩身日五期誠迫寸膚靳實頻責躬虔九叩尺

澤救農民

海光寺瞻禮作

浴佛日應禮祇園海光梵寺城南有出城騁望白茫茫
一綫長隄水中走亦因去歲秋潦積不異今春趙北口
嗟哉吾民被昏墊賑加一再苦仍受爲籌減壩豫洩漲
復恐潮灌傷田畝是則扞格進退艱治河善策誠棘手
佛固無心我有心和南爲籲甘膏宥低地弗雨庶速涸
高地卽雨旱方救左之右之措意難方寸頃刻思紛糾
萬民瞻叩萬乘尊萬乘尊難亦知否

甲寅季春月至天津駐柳墅行宮之作

長隄步輦府城觀虔謁

重刊天潢月令
卷四
聖製
崇禘露冕冠兩次成三賴

天錫八旬有四愜民歡笙歌聽厭衢和巷安阜情非飢與
寒詎鮮遠村向隅者宜咨量吏佈恩寬

崇禘觀瞻禮成什

崇禘真是荷

崇禘恰憶戊申瞻禮時一逆已聞解京信次兕尙額就俘
馳

天庥頻疊何修遇心臧肝宵勵悚寅莫不照臨莫不佑敢
同橫議謂多祠

望海寺作

津府近臨海寺因望海稱衆誠一念合永夏萬年徵據
敬春秋閱祈安瞻禮仍蒙

恩真疊疊撫已益兢兢

海光寺作

海河四十里而長瀛渤遙光隔渺茫悟得如來暗指處
庶幾了見海之光

仁宗睿皇帝御製詩

庚戌過津門舟中作三首

甲辰下江浙淮浦放行舟問景平山嶼觀潮揚子樓萍
踪暫棲息駒影幾春秋又趁颿檣力重爲掛席遊

汶水春流穩揚帆錦浪中疾徐豈人力順逆任天風岸
柳臨窗綠汀桃映纜紅津門間新景海月正高空

西望蜀山湖茫茫若具區波清浮碧藻天遠接平蕪沃
壤連齊魯孤蓬憶越吳遊期又將半歸棹紀舟途

命免天津府屬積欠詩以示直隸總督方觀承

去歲秋告登編氓解逋賦今春蠲南巡免三逮經路

南巡

經過直隸州縣今歲

應徵正額免十之三津門近海濱下溼多沮洳積欠非

一朝致然豈無故與民樂休息保赤吾衷素新恩所不
及曲體惟要務帑則免其徵糧亦豁其輸閭閻留有餘
是豈非藏富長官善推行莫容胥吏蠹

卷四終